

17/08/2001

Kurang ilmu agama punca remaja terjebak gejala negatif

Azrin

DUNIA kini dikejutkan dengan gejala yang kian menular di kalangan remaja moden masa kini. Belum selesai gejala merogol dan membunuh, timbul pula gejala Black Metal yang saya kira begitu jijik di sisi Islam.

Dalam negara Islam seperti Malaysia masih wujud golongan yang kurang berpengetahuan. Siapa yang harus dipersalahkan dalam hal ini? Ibu bapa, guru atau remaja sendiri?

Namun, yang nyata dalam pemikiran saya sebagai remaja, mereka yang terbabit dalam gejala Black Metal ini kurang penghayatan nilai agama dan kedangkalan ilmu. Memang tidak dinafikan, semua umat Islam diberikan nilai agama sejak kecil lagi.

Namun, jika dinilai dari segi penghayatan dan pengamalan nilai agama dalam kehidupan seharian, ternyata remaja masih ketandusan kedua-dua elemen itu. Jika dilihat kepada ahli Black Metal, siapa sangka pelajar sekolah agama turut terbabit?

Pada persepsi pertama kita, tentunya pelajar sekolah agama dilindung atau dipagari ilmu agama, tapi sebaliknya berlaku. Macam mana kita hendak menarik orang kafir untuk mengkagumi Islam sedangkan umat Islam sendiri masih belum mampu berdiri teguh? Adilakah bagi kami yang setakat ini masih belum terpengaruh? Jangan sebab nila setitik, rosak susu sebelanga.

Pelajar IPT juga dilaporkan terbabit dalam gejala jijik ini, sedangkan mereka adalah golongan intelektual yang bakal memimpin negara. Untuk apa ke IPT kalau hanya untuk membuang masa dengan melakukan aktiviti sebegini?

Meminati muzik tidak salah, tetapi biarlah sesuai dengan nilai agama kita. Yang paling saya sedih apabila bangsa Melayu sendiri yang terbabit. Lupakah kita kepada sajak "Melayu Mudah Lupa"?

Menyokong pembangunan yang dibuat tidak akan bererti jika tidak diiringi dengan pengamatan yang baik. Remaja seharusnya lebih peka dengan matlamat Wawasan 2020. Seharusnya kita sebagai remaja tidak terbabit dalam gejala sebegini kerana kita tonggak negara pada masa depan.

Pemimpin sekarang seperti Datuk Seri Dr Mahathir Mohamad dan pemimpin berkaliber lain tidak selamanya memegang tanggungjawab memerintah negara ini dan tanggungjawab itu akan diambil alih kelak. Pada waktu itulah, tenaga dan kebijaksanaan remaja diperlukan. Jika senario sebegini berterusan, mampukah kita?

Semoga, suatu hari nanti kita semua bebas daripada segala masalah sosial yang menghimpit ini.